



SUSUNAN SAMBAYANG ONTOK NYAMBUT HARI Gawe DAAPM KUMPULAN KENE' ATO SABUAH KALUARGA

Sataga pajaan diri' basakat sawaktu ngadapi' Covid19 sarata ngelakatn ia tasebar, Hari Gawe tahutn 2020 ana' diramii' make cara bakomo' barami-rami. Walo jamaipun, diri' urakng Kristian tarus dapat nyambut Hari Gawe make cara basambayang daapm diri' sakaluaraga. Sabab diri' nyambut Hari Gawe Dayak koa bakatujuatn karamian ontok batarima' kaseh ka Tuhan sataga barakat'e ang di mare'atn ka diri' sapanjang tahutn ang udah. Aturatn sambayang nyian dikatuhai' oleh katuha kaluarga, atopun sape aja ang dapat ngulu'atn sambayang di daapm kaluarga koa. Kalo dapat minta' kabatn kamuda' ang ngatuhai' daapm balagu ngan maca Masmur 100.

NYANYI ATO HIM MUIH DINGALAGUATN

Ato sanyap sakajap

Katuha: Daapm dama + Bapa', Anak ngan Roh Kudus. Amin

Tuhan ang Pangabis bakoasa, Tuhan ang kakal sa ama-ama'e, hari nyian kami bakomo' di sia daapm dama Kita' sabab kami mao' mare' puji ngan tarima' kaseh ka kabatoatn ngan kakasihatk Kita' ang ana' takira kaya'e ang udah mare' kami paluang ontok nyambut Hari Gawe Dayak. Walopun tahutn nyian kami ana' dapat nyambut Hari Gawe Dayak make cara bakomo' barami-rami, tapi kami dapat bakomo' sabiikatn kami di sia. Daapm dama Anak Kita', Tuhan Yesus Kristus kami badoa.

Samu'e: Amin

MASMUR 100

Baca Masmur nyian bagante'-gante'

Katuha: Balagu karepoatnlah ka Tuhan, samu'e dunia!
Sambah Tuhan ngan asa ati, lalu atakng notok la mak'e lagu karepoatn.

Urakng: **Ame ana' ngako' Tuhan koa nangga' Tuhan!**
la nampa' diri' lalu diri'lah anu'e. Diri'lah kamuda'e, diri' nyianlah kabatn anak biri'e.

Katuha: Tama'lah malalui' pintu Rumah Sambayang nabanana doa tarima' kaseh. Mansang notok tempat ang kudus make nyanyi puji. Batarima' kaseh ka la sarata mare' puji ka la.

Urakng: **Tuhan nangga' bato. Kakasihatk'e kakal sa'ama- ama'e, lalu katatapatkn ati'e ana' pane barubah.**

Samu'e: **Mulialah ka Bapa', ngan Anak, ngan ka Roh Kudus,**
Aya mula-mula'e are', kania', lalu sampe ka sa ama-ama'e. Amin

Katuha: Tuhan ang pangabis bakoasa, Bapa' kami ang di Saruga; kami hari nyian bakomo' di sia, bubuh, angaki ngan ambini, tuha-mudaatn nabanana karepoatn ati sarata asa mao' badoa ka Kita' ang puhutn kaatakngan kaidupatk, kakasihatk sarata barakat ka kami manusia.

Kami batarima' kaseh ka Kita' Tuhan, sabab hari nyian kami nyambut Hari Gawe Dayak. Di daapm karepoatn kami mare' puji ngan tarima kaseh ka samu'e barakat ang udah Kita' mare'atn ka kami, ang di kami make ontok majuatn aturatn karajaan sarata uga' jukut ang di kami ngarajaan. Tarima' kaseh uga' ka kasihatn Kita' sarata kasehatatn tubuh-badan kami ang di kami ngarasai' kania', sarata kabatoatn lain ang kami ngarasai' di daapm kaluarga kami nyian; talabih agi' ka kamujuratn ba uma-batahutn, anak-cucu' kami am basikolah, jukut ang di kami ngarajaan sarata pakara lain ang ana' takataatn oleh kami di sia.

Kami badoa sarata minta' ka Kita' Tuhan; supaya Kita' nanangan, maratiatn; nyampedoatn, narenyekngan, badampingan, ngalindungi', nyalamatatn, marakati', ngaraduatn, nyagai', ngamujuratn, ngatur; kaadaatn, karidupatn, ati, pikiratn, olah, kata ngan kasehatatn kami. Iringanlah kami make Roh Kudus Kita' supaya salapas nyian kami ngaka'atn samu'e olah, pikiratn sarata karajaan ang ana' bato, lalu supaya Roh Kudus mare' kami kakoatatn ngarajaan samu'e kabatoatn sarata karajaan ang cuci-barasih.

Ampuni'lah dosa kami ang sa ama nyian, bare' kami kakoatatn di daapm kalamahan kami, atur bato agi' pagaulatn kami ngan ayukng kami, lalu suruhlah tagap ati kami di daapm kapucayaatn lalu nunaatn Kita', supaya kami ana' mudah nyempakng umpat dari ajaratn Kita' lalu salalu basarah ka Kita' aja' ang Tuhan kami.

Bapa' am bapangasih, kami uga' badoa sarata batarima' kaseh sabab Kita' udah nyagai' kami umpat dari kana panyakit Covid-19. Kami uga' badoa supaya koasa Kita' tarus ngalindungi' lalu nomoan nagari sarata tubuh kami umpat dari panyakit koa ngan panyakit lain uga'. Kami badoa supaya nagari ngan Gereja Kita' dapat muakng bato barahu aya sa ama nyian; supaya Gereja Kita' tarus mansang maju daapm kabatoatn sarata kamuliaatn Kita'. Kami badoa lalu bapinta ka samu'e nyian di daapm dama Anak Kita', Yesus Kristus ang Tuhan ngan Panyalamat kami.

Samu'e: Amin

Katuha: Tuhan ang pangabis bakoasa, kami mare' puji sarata batarima' kaseh ka samu'e kabatoatn Kita' ang udah ngiringan nyejengan, nyaga maratian, nyalamatatn sarata marakati' kaidupatn kami sapanjang karidupatn kami daapm tahutn ang udah lapas. Lalu kania' ari'e kami ngaweatn barakat Kita' koa. Ka tahutn di adap, kami minta' Kita' namahi' samu'e barakat ang udah di kami ngarasai'; supaya Kita' namahi' pamane, katamuan, kapintaratn sarata samu'e kamajuatn am baguna ka tubuh ngan sumangat kami; supaya kami sanang sehat, anyakng umur, nyaman tarigas nyagai' binua. Kami uga' badoa minta' Kita' marakati' sarata ngudusatn samu'e joadah ang udah dinyadiaatn sarata ang mao' dipakunsiatn sabayaatn kami. Di daapm dama Tuhan + am Bapa', Anak ngan Roh Kudus.

Samu'e: Amin

Katuha: Ayohlah diri' sabaya nyabut Doa ang di Tuhan Yesus ngajari' diri.

Samu'e : Bapa' kami ang di Saruga,
Kuduslah dama Kita',
Ataknglah parentah Kita', Jajilah kamao'an Kita',

Di bumi aya di Saruga,
Bare'lah kami hari nyian kaparluatn kami hari-hari,
Ampuni'lah dosa-dosa kami,
Aya kami ngampuni' kabatn'e am badosa ka kami,
Amelah nabanam kami ka daapm pancobaatn,
Tapi bebasatnlah kami umpat dari kajahatatn,
Sabab nuk Kita'lah pamarentahatn, koasa, ngan kamuliaatn,
kania' ngan sa ama-ama'e. Amin.

Samu'e: Barakat Yesus Kristus Tuhan diri',
Sarata kakasihatan Tuhan am Bapa,
Ngan kasatuatn Roh Kudus,
Nyaratai' diri' samu'e, kania' samp'e saama-ama'e. Amin.

